

Este, ma non hanno auto tal gratia, nè la potranno avere, per le provisione sono stà facte. E poi, ritornato a horre 23, ha trovato leterè di Verona, di domino Francesco Boldiero, de XV. Come, a dì 14, erano partito di Verona bandiere 4 de' todeschi, che sono, in tutto, fanti 1200, capetani di le qual sono Redolfelsi Festadi et Schuden; e da poi è partito uno altro capetanio, ch'è sopra li doi predicti, nominato el conte Zorzi Fransperg; e, si dice, vanno a trovar missier Zuam Giacomo di Triulzi, e questo li ha afirmado uno di Tocholi, citadin veronexe, in casa dil qual li alloza Alvise Darsi, al qual, per el ditto missier Zuam Giacomo, li è stà scripto, li debbi mandar fanti 2000 in socorsso suo, per la rota che hanno hauto; perhò li è stà mandati li 1200, tutti discalzi et disarmati, che pareno furfanti. E, per avanti, haveano cassado in Verona cercha todeschi 500, li qualli andavano per la terra cerchando per l'amor de Dio; a li qualli adesso, per il presente suo bixogno, li hanno dato certi pochi danari, ma non hanno nè in pe', nè in dosso. *Item*, a dì 14, *etiam* furono dato danari a la compagnia de Maldonato, spagnol, ch'è nostro prexom a Venexia, et a una altra compagnia de spagnoli, el capetanio de la qual è chiamato Comesoar, ne le qual doe compagnie, se stima, esser fanti 400. E la causa di aver dato tal danari fu, perhò, li zorni avanti, se partirono una parte de lhor spagnoli, e, se diceva, erano venuti a le bande nostre. *Item*, scrive dito Boldiero, quel di Tocholi averli dito aver parlato al sopra scripto Comesoar, capetanio, e al suo tamburin, e altri, e, aver inteso, lhor spagnoli esser per levarse e andar verso Zenoa, et esser partito a pocho, a pocho, circha lanze 40 francese di più compagnie; di che, il resto che sono in Verona, sì franzesi, come todeschi, spagnoli e altri marani rebelli, tutti stanno con la testa bassa vedendo aproximarsi quel felice zorno di la ingressiom nostra in quella città. *Item*, è stà levate via tutte le artellarie che erano a li repari di Lignago, e poste ne la rocha. *Item*, ha 'uto una poliza da Cerea, per la qual è avisato, Lodovico Dalben voler condur a Lignago minali 1500 di biave da cavalo, e mezene 200, con 100 peze de formazo; di le qual tutte nove ha dato notizia al provedador Griti et al governador zeneral, ch'è a Montagnana.

Nota. A dì 19, fo consejo di X, et fato, in loco di sier Francesco Foscari, el cavalier, cao, era amato, fu electo vice cao, et resterà poi per l'altro mexe, sier Hironimo Tiepolo, fo consier, che più non è stato.

Vene in questa terra, venuto dil campo di Bolo-

gna, il strenuo Zuam da Orti, condutier nostro di cavali lizieri, et fo in colegio. Disse e dimandò alcune cosse; fo expedito e tornoe.

A dì 21. Fo consejo di X, simplice, nel qual manchoe sier Bernardo Bembo, dotor et cavalier, consier, et sier Anzolo Trivixan; et sier Francesco Foscari, el cavalier, cao, vene. Fo expedito il processo di sier Gasparo Valier, *quondam* sier Stefano, qual amazò Rocho, cao di cavalari, a Treviso, et fu preso di taiarli la testa, a dì 24, in mezo le do colone, a lui et a uno vilan, era con lui. Et questa deliberation fu tenuta secreta per doy zorni, et poi, per il cao dil consejo di X et l'avogador, li fo dita tal cossa; *adeo*, inteso, tutta la terra l'have forte a mal. Et fo dito, esser stà preso di taiarli la testa, di una balota, et il doxe aver fulminato contra di lui. Et nota, questi sono quelli intrò in dito consejo di X, ozi.

El serenissimo.

#### Consieri.

Non. Sier Bernardo Bembo, dotor, cavalier.

Sier Francesco Trum.

Sier Piero Duodo.

Sier Alvixe Contarini.

Sier Alvixe Malipiero.

Sier Zorzi Pixani, dotor, cavalier.

#### Cai di X.

Sier Andrea Loredam.

Sier Andrea Magno.

Sier Francesco Foscari, el cavalier.

#### Consejo di X.

Non. Sier Anzolo Trivixan.

Sier Domenego Beneto.

Sier Marco da Molin.

Sier Hironimo Tiepolo.

Sier Hironimo Querini.

Sier Piero Capello.

Sier Antonio Zustignan, dotor.

A dì 22, *la mattina*. Il patriarcha nostro fo in colegio per veder di ajutar sier Gasparo Valier, non fusse decapitato, dicendo, è di prima tensura, era li cai di X; et fo mandato via dicendo, le deliberation dil consejo di X si conveniva exequir. Et, perhò